

## Alukan sumbangan bahan bacaan

KUALA TERENGGANU – Sumbangan orang ramai adalah dialu-alukan bagi menempatkan bahan-bahan bacaan di Maktabah Al-Ghazali atau perpustakaan di Masjid Al-Muktafi Billah Shah (MABS) atau lebih dikenali dengan nama Masjid Ladang.

Pegawai Masjid Bahagian Maktabah Al-Ghazali, Nurul Fatihah Rosely berkata, sehingga kini terdapat hampir 4,000 naskhah bahan bacaan termasuk tafsir Quran, hadis dan fiqh, tasawur dan kitab-kitab Arab serta koleksi Al-Ghazali.

Menurutnya, perpustakaan tersebut mula dibuka bermula pada jam 9 pagi hingga 5 petang dan beroperasi pada hari Ahad hingga Khamis.

"Kami sentiasa mengalu-alukan orang ramai yang berhasrat mewakafkan bahan-bahan bacaan bagi ditempatkan di Maktabah Al-Ghazali agar dapat dimanfaatkan bersama terutama bahan keagamaan.

"Selain bahan bacaan terpakai atau baharu, kita juga menerima sumbangan berbentuk wang tunai untuk kami membeli bahan bacaan tersebut," katanya.

Menurutnya, perpustakaan itu masuki tahun ketiga dan dimanfaatkan orang ramai terutama jemaah bagi menambah ilmu pengetahuan sementara menunggu masuk waktu solat atau selepas solat.

Namun, Nurul Fatihah berkata, ia terhad untuk dibaca di perpustakaan tersebut sahaja dan bukan berbentuk pinjaman dan perpustakaan tersebut boleh memuatkan 25 hingga 30 orang dalam satu masa.

"Alhamdulillah, sambutan menggalakkan daripada pengunjung yang juga terdiri dari kalangan jemaah (Masjid Ladang) dan menariknya turut membawa bersama anak-anak kerana kita juga mempunyai sudut khas kepada mereka di Qismul Aulad.

"Qismul Aulad sebagai pusat penempatan sementara ketika ibu bapa mengerjakan solat dan juga menyertai aktiviti di masjid. Dengan inisiatif itu, ibu bapa dapat menyertai aktiviti dengan tenang tanpa gangguan anak-anak kecil apabila mereka dijaga dengan baik oleh sukarelawan masjid dari kalangan pelajar perubatan Universiti Sultan Zainal Abidin (Unisza)," katanya.



Antara aktiviti kanak-kanak di Qismul Aulad sebagai pusat penempatan sementara ketika ibu bapa mengerjakan solat dan menyertai aktiviti di masjid.